

Pa Ken Bo ta Bai Vota?

Temporada di kampaña polítiko a ranka sali. For di awor ta bon pa kuminsá pensa pa ken bo ta bai vota.

Algun hende no tin duda pa ken nan ta vota. Desde Adam i Eva, tur nan antipasadonan a basha bala riba siertu koló. Otronan ta vota p'e kandidato pasobra e ta un famia òf amigu/a. Tin hende ku ta vota p'esun ku ta transport'é pa urna, ta duna òf primintí sierto benefisio. Hende asina ta vota ku wowo siegá.

Di otro banda, hopi hende no tin intenshon pa vota mes. Talbes nan no ta haña un kandidato ku nan ta totalmente di akuerdo kun'é. Wèl, si esei ta bo kriteria, anto lo ta pusibel pa vota pa bo mes kasá?

Otronan lo no vota pasobra nan ta haña ku poko kandidato ta meresé nan voto. Segun nan, nan ta vota pa esun ménos malu den tur e malunan. Ma nan ta kiboká. Bo no ta vota p'esun ménos malu den e malunan. **Bo ta vota pa mengua maldat.** Bo ta hasi bo parti pa pone hende den gobièrnu ku lo para firme pa moralidat, loke ta étiko i hustu.

Na nos isla, nos tin e privilegio i responsabilidat pa elihí nos gobernantenan. Pa kua partido i polítiko anto bo mester votá? Ta importante pa bo ta un votadó bon eduká. Hasi bo mes evaluashon ophetivo di e pantaya polítiko. Habri wowo i orea, skucha i analisá loke e partidonan i polítikonan ta bisa. I kisas e siguiente surgerensianan lo fasilitá bo evaluashon.

1) Kiko ta idiologia di kada partido? Kua bo ta mas di akuerdo kun'é? Kua ta harmonisá mas ku Skritura santu?

2) Análisá i kompará e programa di akshon di kada partido. Nota tantu loke nan ta deklará komo loke nan ta evitá di bisa. Nan metanan ta moral, realisabel i nesario? Ta fásil pa hasi hopi promesa; ma nan **por** kumpli?

3) Wak bon pa ken bo ta vota. Na fin di su reino di 40 aña, David a skirbi kon plasentero i refreskante ta “Esun ku ta goberná hende ku hustisia, ku ta goberná den temor di Dios...” (2 Samuel 23:3-4). Nota e dos punto aki.

Beibel ta bisa “Hustisia ta halsa un nashon, ma piká ta un bèrguensa pa kualké nashon. Ora ku e hustunan oumentá, pueblo ta regosihá, ma ora un malbado ta goberná, pueblo ta suspirá” (Proverbionan 14:34; 29:2). Nos tin mester di mandatarionan hustu, gobiènantenan ku ta repudiá práktikanan i pólisanan ku no ta étiko, lídernan ku lo promové normanan haltu di moralidat.

“Temor pa Dios” sigur mester ta mentalidat di e polítiko... no su palabranan so! Un hende ku tin temor pa Dios ta kòrda ku e tin ku duna kuenta n'e Mandatario Supremo di universo pa su bida personal i su gobernashon i ta ahustá su bida i gobernashon na e echu ei. Un polítiko ku no tin e konvikshon ei por ta despuesto pa usa kualke medio pa logra su meta (irespekto di kuantu daño e ta hasi na otronan pa logr'é).

Wak bida personal i familiar di e polítiko. Algun hende ta haña ku e bida privá ta totalmente isolá for di e polítiko su abilidadat pa goberná. Ma nan ta kiboká. Por ehèmpel, si el a kòrta orea di su kasá—**no a kumpli ku e promesa mas sagrado ku el a yega di hasi—kon por konfia su palabranan polítiko?**

4) Si e polítiko ya kaba a sirbi den gobièrnu, su trayekto por indiká hopi. Pa kua proposishonnan el a vota, i kua el a oponé? Kiko el a logra durante su tèrmino di servisio? El a kumpli ku su promesanan? E tabatin e wesu di lomba pa vota segun su konsenshi, maske esei por perhudik'é polítikamente? El a demonstrá interes bèrdadero pa su pueblo òf pa su mes saku?

Pa ken bo ta bai vota? Si bo ta basha bala solamente segun tradishon òf smak, talbes tantu abo komo bo pueblo lo yora lat ta malai. Ma si bo ke gobiènantenan hustu, ku ta teme Dios, awor ta tempu pa hasi bo hùiswèrk, analisando e pantaya polítiko. Anto dia di elekshon, no keda sin bai vota.